



SULJEVIĆ ALIJA, geod. inž.

6. juna 1992. godine od agresorske granate kao borac Armije R BiH, poginuo je naš dragi kolega i plemeniti čovjek.

Rođen je u Govzi opština Foča gdje je završio osnovno obrazovanje.

Geodetsku srednju tehničku školu je završio u Sarajevu, a odmah zatim upisuje i sa uspjehom završava Višu geodetsku školu.

Alija svoj kratki radni vijek otpočinje u Željezničkom građevinskom preduzeću 1974. godine odakle odlazi na odsluženje vojnog roka. Po dolasku iz tadašnje Armije odlazi u Republiku Sloveniju i zapošljava se u GP Tehnika TOZD-inžinjeriing - Ljubljana i tamo ostaje sve do 1981. godine.

Želja za rodnim krajem, svojim roditeljima i kolegama sa kojima je pohađao školu i radio, razlog su Alijinog dolaska u Sarajevo gdje se zapošljava u Geodetskoj upravi, Skupštine opštine Novo Sarajevo.

Malo je bilo kolega u Sarajevu koji nisu poznavali Aliju. Ako nisu imali priliku upoznati ga na radnom mjestu ili nekom stručnom savjetovanju onda su ga poznavali na našim geodetskim svečanostima gdje je sa suprugom Refijom sjedio uvijek u najveselijem društvu za stolom, najčešće blizu muzike.

Na radnom mjestu kao i u našem Društvu inženjera i geometara bio je izuzetno cijenjen i nije pokazivao znake umora kako za kolege na poslu tako i za građane - stranke za koje je Alija radio i završavao poslove iz oblasti geodetskih poslova koji se obavljaju u katastru.

Odmah po izbijanju agresije na našu republiku stupio je u redove Armije R BiH i u Pofalićima gdje je i stanovao u svojoj porodičnoj kući, organizovao jak otpor agresoru skupa sa svojim komšijama. Učesnik je čuvene Pofalićke bitke 16.05.92. godine koja je po ocjeni mnogih bila presudna za ovaj grad jer je agresor baš preko Pofalića namjeravao presjeći i podijeliti Sarajevo.

Pogibijom našeg Alije Suljevića, njegovi prijatelji i kolege izgubili su dobrog i iskrenog druga, a sjećanje na njega ostaće nam vječna uspomena.

*Himzo Drakovac*